



Aningaasaqarnermut Naalakkersuisoq

Ulloq: 7. december 2018
J.nr.: 01.31.06/18-00820

Aningaasaqarnermut Akileraartarnermullu Ataatsimiititaliap pingasunngornermi ulloq 5. december 2018 aalajangiineranik Naalakkersuisunut ilisimatitsineq.

Kontumut pingaarnermut 10.10.10, Naalakkersuisut, ilassutitut aningaasaliissuteqarnissamut qinnuteqaat - Suliaq nr. 01.31.06/18 – 00820.

Naalakkersuisut inassutigaaat,

- ”- kontumi pingaarnermi 10.10.10-mi, Naalakkersuisunut tunngasumi, aningaasaliissutit 500.000 koruuninik amerlineqassasut, aamma
- kontumi pingaarnermi 20.11.73-imi, Inuussutissanik nammineq pilersornerulernissamut sillimmatinut tunngasumi, aningaasaliissutit 500.000 koruuninik ikilisinneqassasut”

Aningaasaqarnermut Akileraartarnermullu Ataatsimiititaliap oqaaseqaatai apequtaalu:

Ilassutitut aningaasaliissuteqarnissamik qinnuteqaammi pissutsit arlallit itisileqqullugit Aningaasaqarnermut Akileraartarnermullu Ataatsimiititaliap ulloq 28. november 2018-imi allagaqarluni Naalakkersuisut qinnuigai. Naalakkersuisut akissutaat ataatsimiititaliamit ulloq 30. november 2018-imi tiguneqarpoq.

Isummernissamut tunngavissiami paasissutissiissutigineqarpoq atuinerusoqarneranut pingaartumik Inatsisartunut qinersineq pissutaasoq, tassani Naalakkersuisuni ilaasortanngortoqarneranut ilaasortaajunnaartoqarneranullu atasumik aningaasartuuteqartoqarsimammat, aningaasarsiaqartitsineranut, ilaasortaajunnaarnersiuteqartitsineranut kiisalu ineqarnerup pequttallu nuutinneqarnerannut malittaasumik aningaasartuutitik atuisoqarsimalluni. Paasissutissat takku missingersuutitut ilanngussami ilanngullugu nassiunneqartumi aamma allassimapput.

Kiisalu paasissutissiissutigineqarpoq Naalakkersuisut Siulittaasuata Naalakkersuisoqarfia 2018-imi qaammatini kingullerni pingasuni atuinissamut missiliuisoq, ilaatigut ukiup sinneranut Naalakkersuisunut ilaasortat ukiup sinneranut angalanissamut pilersaarutaannik paasiniaanikkut. Missiliuinerup takutippaa ilassutitut aningaasaliissutit 500.000 kr.-t missaannik nikingassutaasumut nalimmassaassasut.

Aningaasarsiaqartitsineranut, ilaasortaajunnaarnersiuteqartitsineranut soraarnerussutisiaqartitsineramullu manna tikillugu aningaasartuutaanerussutaasut 1 mio. kr.-it missaanniittut ataatsimiititaliap apequtaanut akissummi Naalakkersuisut aamma paasissutissiissutigaaat. Angallassinermut, pequttat nuunnerinut ineqartitsineramullu aningaasartuutit 630.000 kr.-it missaanniipput. “Ukiumut qinersiviunngitsumut” sanilliullugu aningaasartuutit amerleriaataat ataatsimut 1,6 mio. kr.-it missaanniittut paasissutissiissutigineqarpoq.

Missingersuutitut ilanngussat ataatsimiititaliap aalajangiinissaanut sukumiisumik tunngavissiiisussaammata aammalu ilassutitut aningaasaliissuteqarnissamik qinnuteqaatinut atatillugu Naalakkersuisut isummernissaannut tunngavissiat missingersuutinullu ilanngussat allanik iluaquteqarani atuarneqarsinnaallutillu paasineqarsinnaasussaammata ataatsimiititaliamit erseqqissaatigineqassaaq. Taamaattumillu Naalakkersuisut ilassutitut aningaasaliissuteqarnissamik qinnuteqaataanni suliassaq erseqqissumik allaaserineqarsimassammat Naalakkersuisunut ataatsimiititaliamit erseqqissaatigineqassaaq. Kiisalu suliamik immikkuualuttut ilanngullugit peqqissaarnerusumik allaaserinnittarnissamik Naalakkersuisut ataatsimiititaliamit nalinginnaasumik kaammattorneqarput, taamaaliornikkut aningaasaliissuteqarnissamik suliassani ataasiakkaani ataatsimiititaliap isummerfiginninnissamik kinguartitsisariaqarneri ikinneruleqqullugit.

Aningaasaqarnermut Akileraartarnermullu Ataatsimiititaliap aalajangiinera

Siuliani allassimasutut oqaaseqaateqarluni Naalakkersuisut inassuteqaataat Aningaasaqarnermut Akileraartarnermullu Ataatsimiititaliamit **akuerineqarput**.

Inussiarnersumik inuulluaqqusillunga



Karl Kristian Kruse

Aningaasaqarnermut Akileraartarnermullu Ataatsimiititaliap siulittaasua